

**- SENAT -**

Broj: 01-4-1/20

Sarajevo, 11. 03. 2020. godine

**Z A P I S N I K
SA 22. VANREDNE SJEDNICE SENATA
ODRŽANE 11. 03. 2020. GODINE**

Prisutni članovi Senata: prof. dr. Rifat Škrijelj, rektor Univerziteta u Sarajevu, prof. dr. Dubravka Pozderac-Lejlić, prof. dr. Mersad Čuljević, prof. dr. Erdin Salihović, prof. dr. Jasmina Selimović, prof. dr. Nedžad Korajlić, prof. dr. Sead Turčalo, prof. dr. Haris Alić, doc. dr. Amel Kosovac, prof. dr. Arzija Pašalić, prof. dr. Samija Muratović (po ovlaštenju), prof. dr. Muhamed Dželilović, prof. dr. Mirza Pozder (po ovlaštenju), prof. dr. Darko Tomašević, prof. dr. Đerzija Begić-Hajdarević (po ovlaštenju), prof. dr. Semra Čavaljuga, prof. dr. Senad Kazić, doc. dr. Daniel Maleč, prof. dr. Muhamed Brka, prof. dr. Hajrija Sijerčić-Čolić, prof. dr. Mustafa Memić, prof. dr. Mirjana Gojkov-Vukelić (po ovlaštenju), prof. dr. Dževada Sokolović (po ovlaštenju), prof. dr. Rizah Avdić (po ovlaštenju), dr. sc. Anja Haverić (po ovlaštenju), dr. sc. Adnan Kadrić, dr. sc. Amir Kliko, dr. sc. Sedad Bešlija, dr. sc. Alen Kalajdzija, prof. dr. Enra Suljić (po ovlaštenju), gđa Adisa Žero, doc. dr. Emir Tahirović.

Prisutni predstavnici studenata: Hamza Vahid El Din, Lamija Ugarak, Amar Kolašina, Ivan Perković i Mahir Omerović (po ovlaštenju).

Ostali prisutni: prof. dr. Tarik Zaimović, prof. dr. Dženana Husremović, prof. dr. Aida Hodžić, prof. dr. Aleksandra Nikolić i prof. dr. Maida Čohodar-Husić, prorektori, Rijana Jusufbegović, studentica-prorektorica, prof. dr. Melika Husić-Mehmedović, direktorica CIS-a, prof. dr. Teufik Goletić, član federalnog Kriznog štaba, Kenan Filipović, generalni sekretar po ovlaštenju, i Mirnes Ibrić, dipl. iur., predstavnik Službe za pravne poslove.

Odsutni članovi Senata: prof. dr. Jasmin Velagić, prof. dr. Ahmet Alibašić, Benjamin Crljenković i Adis Holjan.

Sjednica je počela u 15:00 sati.

Sjednicom je predsjedavao prof. dr. Rifat Škrijelj, rektor Univerziteta u Sarajevu.

Utvrđeno je da od ukupno 41 člana Senata sjednici prisustvuje 37 članova Senata, od toga 10 članova sa ovlaštenjem koje se nalazi u dokumentaciji Senata.

Prof. dr. Rifat Škrijelj je predložio da se na današnjoj sjednici zauzme stav u vezi sa inicijativom Kriznog štaba Ministarstva zdravstva Kantona Sarajevo da se u prostoru Instituta za istraživanje zločina protiv čovječnosti i međunarodnog prava Univerziteta u Sarajevu napravi izolatorij.

Prof. dr. Rifat Škrijelj pozvao je članove Senata da se izjasne o prijedlogu dnevnog reda.

Jednoglasno je usvojen sljedeći

DNEVNI RED

1. Organizacija nastavnog procesa na Univerzitetu u Sarajevu u uvjetima pojave koronavirusa (COVID-19)
2. Stav Senata u vezi sa inicijativom Kriznog štaba Ministarstva zdravstva Kantona Sarajevo da se u prostoru Instituta za istraživanje zločina protiv čovječnosti i međunarodnog prava Univerziteta u Sarajevu napravi izolatorij

TOK SJEDNICE

Ad-1.

S obzirom na aktuelnu epidemiološku situaciju u BiH i regionu i odluke i preporuke kriznih štabova ministarstava zdravstva KS i FBiH, te shodno tome i na pristupanje Univerziteta u Sarajevu organizaciji i realizaciji nastavnog procesa na Univerzitetu u Sarajevu u uvjetima pojave koronavirusa (COVID-19), prof. dr. Rifat Škrijelj otvorio je diskusiju u kojoj su učestvovali: prof. dr. Aida Hodžić, prof. dr. Semra Čavaljuga, prof. dr. Enra Suljić, prof. dr. Rifat Škrijelj, Hamza Vahid El Din, prof. dr. Teufik Goletić, prof. dr. Darko Tomašević, prof. dr. Muhamed Brka, prof. dr. Arzija Pašalić, doc. dr. Daniel Maleč, prof. dr. Nedžad Korajlić, prof. dr. Jasmina Selimović i prof. dr. Sead Turčalo.

U skladu sa stavovima iznesenim u diskusiji, uz 1 „suzdržan“ glas doneseni su zaključci o izmjeni načina realizacije nastavnog procesa na Univerzitetu u Sarajevu u periodu od dvije sedmice s početkom od 12. 03. 2020. godine i preporuke o ponašanju studenata i zaposlenika, kako slijedi:

ZAKLJUČCI

1. Teoretska i praktična nastava „u učionici“ na organizacionim i podorganizacionim jedinicama Univerziteta u Sarajevu se obustavlja. Sugerira se organizacionim i podorganizacionim jedinicama organizacija i realizacija *online* nastave korištenjem već uspostavljenih platformi za DL-studij, besplatnih platformi, intraneta, e-maila i svih raspoloživih kanala elektronske komunikacije.
2. Nastava koja se izvodi izvan prostora organizacionih i podorganizacionih jedinica se u potpunosti obustavlja.
3. Nastava koju nije moguće realizirati *online* mora se u potpunosti nadoknaditi po stjecanju uvjeta, a u dogovoru sa asocijacijama studenata OJ.

4. Zadužuju se nastavnici i saradnici Univerziteta u Sarajevu za intenzivnije konsultacije i komunikaciju sa studentima putem raspoloživih kanala e-komunikacije.
5. Obavezuju se studenti da vrijeme *online* realizacije nastave maksimalno koriste za učenje i spremanje ispita čiji termini u ovom momentu ostaju u skladu sa već utvrđenim akademskim kalendarom za studijsku 2019/2020. godinu.
6. Zadužuju se rukovodioci i uposlenici Univerziteta u Sarajevu – nastavno i nenastavno osoblje, osim onih iz rizičnih kategorija i onih sa manifestnim simptomima respiratornih infekcija – na pojačan rad na radnom mjestu, ali po potrebi i od kuće u smislu: organizacije radnog procesa u promijenjenim uvjetima – smanjenje ličnih kontakata, priprema materijala za *online* nastavu, intenzivne konsultacije i sa studentima putem e-komunikacije, praćenje realizacije *online* nastave i učenja, pojačane mjere higijene prostora i opreme, pojačana kontrola ulaska u objekte i zadržavanja u istim...
7. Otkazuju se sve aktivnosti koje podrazumijevaju okupljanja i direktne kontakte većeg broja osoba, među kojima i aktivnosti iz projekta promocije upisa na UNSA u studijskoj 2020/2021. godini („Budi student fakulteta/akademije UNSA na jedan dan“, „Dan otvorenih vrata UNSA“), te se promocija upisa ima provoditi putem medija i društvenih mreža.
8. Univerzitet u Sarajevu će nastaviti sa praćenjem epidemiološke situacije i preporuka nadležnih institucija, te postupati u skladu sa istim.
9. Formira se Krizni štab Univerziteta u Sarajevu koji čine rektor, prorektori i predsjednici grupacija nauka i umjetnosti.

P R E P O R U K E

COVID-19: Preporuka postupanja za studente i uposlenike Univerziteta u Sarajevu Specifične mjere zaštite za COVID-19 (en. Coronavirus disease-19)

Mjere za sprečavanje unosa i ranu detekciju COVID-19

U skladu s preporukama Svjetske zdravstvene organizacije, kao i u skladu sa Zakonom o zaštiti stanovništva od zaraznih bolesti („Službene novine Federacije BiH“, broj 29/05), potrebno je provesti postupke koji su usmjereni na rano otkrivanje eventualnog slučaja COVID-19 i sprečavanja širenja uzročnika bolesti.

S tim u vezi, za sve studente i uposlenike koji su unazad 14 dana boravili u Kini, Iranu, Južnoj Koreji, Francuskoj, Njemačkoj i Španiji te koji su doputovali u BiH iz Italije, posebno italijanskih pokrajina Lombardija, Veneto, Emilia Romagna i Pijemont, u trajanju od 14 dana od napuštanja zahvaćenih područja, provodi se:

1. aktivan zdravstveni nadzor (javljanje zdravstvenog stanja teritorijalno nadležnom epidemiologu prema adresi stanovanja/boravka)
2. samoizolacija na temelju rješenja graničnog sanitarnog inspektora o podvrgavanju zdravstvenom nadzoru radi praćenja pojave simptoma respiratornih bolesti.

U smislu navedenih preporuka potrebno je provesti i:

- aktivan zdravstveni nadzor nad **zdravim studentima i uposlenicima** koji dolaze iz zahvaćenih područja, **a nemaju neke od simptoma respiratornih smetnji**, što

podrazumijeva samoizolaciju kod kuće ili u studentskom domu (organiziranom smještaju) i pri tome trebaju u prostoriji/sobi boraviti sami. Dakle, kada god je moguće, **organizirati da takav student ili uposlenik boravi sam u sobi** te da ne dijeli sobu s drugim osobama;

- **studenti i uposlenici koji dolaze iz zahvaćenih područja, a imaju neki od simptoma respiratornih smetnji** (nagli početak barem jednog od sljedećih simptoma: povišena tjelesna temperatura, kašalj i otežano disanje („borba za zrak“)), obavezno trebaju kontaktirati nadležnu epidemiološku službu.

S obzirom na dinamičan razvoj epidemiološke situacije kako u BiH i regionu tako i u svijetu, navedene preporuke se mogu promijeniti te je stoga neophodno pratiti internetske stranice Federalnog zavoda za javno zdravstvo (<https://www.zzjzfbih.ba/covid-19/>) i Zavoda za javno zdravstvo Kantona Sarajevo (<https://www.zzjzks.ba/coronavirus/>) na kojima se svakodnevno objavljuju ažurirani podaci u vezi sa koronavirusom kao i mjerama prevencije.

Opće mjere zaštite

Uz navedeno, neophodno je u organiziranom smještaju studenata, kao i u prostorima Univerziteta u Sarajevu, sanitarnim čvorovima te u prostorima gdje je organizirana ishrana osigurati:

- pranje ruku sapunom i tekućom vodom te sušenje ruku jednokratnim ručnicima ili korištenje dezinficijensa na bazi alkohola
- izostanak sa radnih/nastavnih obaveza uposlenicima i studentima koji imaju simptome infekcije dišnih puteva, imaju povišenu temperaturu, grlobolju, kašalj i otežano disanje
- redovno a najmanje dva puta dnevno provjetranje prostorija
- poticanje boravka na otvorenom kada god to vremenske prilike dozvoljavaju

Studente i uposlenike podsjećamo na pridržavanje preporuka općih mjera zaštite:

- redovno pranje ruku sapunom i vodom ili upotreba dezinficijensa na bazi alkohola
- prilikom kašljanja i kihanja potrebno je prekriti usta i nos papirnatom maramicom i poslije je odbaciti u koš za otpatke te oprati ruke
- izbjegavati bliski kontakt i neverbalnu komunikaciju (rukovanje, grljenje, ljubljenje) s osobama koje imaju simptome infekcije dišnih puteva, imaju povišenu temperaturu, grlobolju, kašalj i otežano disanje

Zaključci i preporuke bit će odmah objavljeni na veb-stranici Univerziteta u Sarajevu i veb-stranicama organizacionih jedinica Univerziteta u Sarajevu.

Ad-2.

Jednoglasno je donesen sljedeći

ZAKLJUČAK

1. Univerzitet u Sarajevu je informiran da je od predstavnika Kriznog štaba Ministarstva zdravstva Kantona Sarajevo najavljena mogućnost izmještanja Instituta za istraživanje zločina

protiv čovječnosti i međunarodnog prava Univerziteta u Sarajevu na drugu lokaciju s ciljem pravljenja izolatorija u prostoru Instituta.

2. Univerzitet u Sarajevu traži od Vlade Kantona Sarajevo da u slučaju realizacije aktivnosti navedenih u tački 1. ovog zaključka prethodno obezbijedi adekvatan prostor za izmještanje Instituta za istraživanje zločina protiv čovječnosti i međunarodnog prava Univerziteta u Sarajevu, posebno uzimajući u obzir značaj Instituta kao i vrijednost arhivske građe koju ovaj Institut posjeduje.

Sjednica je završena u 16:20.

REKTOR

Prof. dr. Rifat Škrijelj, s. r.

Zapisničar:

Alma Voloder-Madacki, s. r.